



DEO OPTIMO MAX.
UNI ET TRINO,

VIRGINI DEIPARÆ, ET S. LUCE

Orthodoxorum Medicorum Patrono.

QUÆSTIO MEDICA,

CARDINALITIIS DISPUTATIONIBUS
*manè discutienda, in Scholis Medicorum, die Jovis,
septimâ Aprilis, 1729.*

M. FRANCISCO PICOTÉ DE BELESTRE,
Doctore Medico, Præsîde.

An Aqua vitæ, Aqua mortis?

I.



LUANT humores benignè, nec rigida sint plus æquo fibræ, nec plus æquo molles, stat microcosmus: reciprocos secum motus consociare ament, viget, & in annos vigebit innumeros. Mirari desine! Noluit parens Natura villos ex unâ parte validius obniti, quam pulsare ex alterâ. Non à fluidis vita: non à solidis duntaxat; sed ab expedito jugique fibrarum liquorumque motu repetenda. Nulla daretur absque liquoribus vasorum expansio: nulla Diastoles. Si submoveatur vasorum renisus; undenam Sistolés? Undè perficitur humorum progressio? Sunt sua liquoribus munia. Sunt solidis appendices

suæ. Arietat indefinenter in canalium parietes amicus ille quem cohibent liquor. Illo distenduntur; nec multò post, præ mirâ quâ pollent elasticâ vi, priorem recuperant statum; humoremque contentum propellunt. Stet temperata solidorum oscillatio: Immodica cave sit aquolarum, ætherearumque, quibus compingitur sanguis, partium perturbatio. Hinc vigent membra, interno pacificoque rore recreata. Immotis tùm, constantissimisque innixus columnis, Nestoreos attinges annos. At brevior vitæ decurtabitur summa, si tollatur blanda & æquabilis solidorum oscillatio; si debita pefundatur fluidorum fluxilitas.

II.

VIX nati tumulo devovemur. Huc tandem deveniendum quo Tullus dives & Ancus. In annosioribus animantibus corporis fibrillæ duiores evadunt, siccioreque. In iisdem humores in progrediendo tardiores, eoque prompti minus ad pororum meatus trajiciendos. Prænumcia hæc senectutis, mortisque ipsius specimina. Fibris rigiditate, tensione nimia, aut Erethismo laborantibus: nulla non corpori morborum cohors incubat. Si lenti humores, si spissi, si acres in alveis suis excipiantur; stragem edunt ubique deplorandam. Labefactatur æquabilis fibrarum oscillatio: innumera statim exurgunt ægritudinum symptomata; & quidem gravissima. Hinc Phrenitis: hinc Plevitis: hinc pravi Pulmonum, Thoracisque labores. Quis Erethismo non adscripserit iliacam passionem? Quis non dolores colicos? non alia sanè Epilepsiz origo. Non alia apoplexiæ, Paralyseos, hystericarum, hypochondriacarumve affectionum causa. Nec minora pariunt incommoda, si steterint, aut remissius fluant humores, quicumque illi sint: vel sanguis, vel succus nerveus, vel lymphæ. Malè torpente sanguine, sitis ora occupat inextinguibilis, & alba faucium siccitas: cutis aret. Obstructiones progeniuntur: vix ægrum trahas spiritum: æstuat intus ignis; valaque ipsa sanguinea disrumpuntur; undè hæmorrhagiæ frequentes &c. Quid de Succo nerveo? intra fibras suas fistulosas, ne diutius immoretur: alias interpolabitur partium motus, sensus & nutritio. Quânam aliâ vi peragerentur corporis functiones; hæc languente languidiores; tota propè virium prostratio; inexplendus somni appetitus. Si variis succussibus partes alluat; alia enascuntur morborum genera: importunus membrorum tremor, motusque spasmodici. Hærent lymphæ bilisque crassitiè tardâ impeditæ. Ne speres alvum subduci facilem. Icterus timeas: febres ardentes: erysipelata: præda futurus, arthritidis, rheumatismi, & catarrhorum. Peceant igitur ea omnia quibus fibræ corrugarentur, crisparenturque, quibus humores in grumos concreverent, malorum omnium progeniem edituros.

III.

IMPROVIDAM sanè hominum mentem! Sapida & spirituosâ potentia, insipidis & naturalibus ut plurimum anteponunt. Vinum aquæ præfertur: interdùm Aquâ vitæ. Nullius non mali seminarium Bacchus est: arridet virum oculis; at viscera distorquet: naribus blanditur; sed quæ blanditiis fides: urget, premit incautos modis omnibus sauciandos. Quid cùm deposito illo quo obvolvebatur phlegmate & empyreumate, igneus evaserit, nullo vinculo, nullis repagulis coercendus: nil tùm nisi volatile,

nisi sulphureum respuit. Stupeat deplorandos Aquæ vitæ: stupeat spiritus vini lethales effectus, quisquis Mechanismum nescierit. Nec suppositus ignis iste est cineri dolofo: Quis ipse sit, declarat confestim. Tantum tetigisse, extremo ore delibasse fat est. Introducitur in os viri rectâ fluentis valetudine: oritur musculorum omnium, membranarumque spasmus diù implacabilis, quo salivæ vel undèquaque percuteatur humor, vel in massam cogatur reflueret sanguineam. Interea delabatur in ventriculum; utinam cibo refertum aliquo: minor exinde ruina; si vacuum, strages partium omnium internarum lugenda. Tunc in obvias quasque fibras ruere impetuosis, membranas exsiccare, mille jaculis confodere, vellicare. Nec parceret intestinis omnia late depopulaturus liquor. Putridus ex eo chylus venas subit lacteas: torridus ubique: sanguinem ipsum jamjam coagulo depravaturus. Quid ad hæc spirituosorum captatores? se ipsos concutiant, toties expertos similia; veritatis hujus sibimet intimè conscios, interpolari Aquæ vitæ potatione, humorum, solidorumque consortium.

IV.

ENUMERET qui potest & vacat singula morborum genera, à spirituosorum potatione progenita. Quid penitiora naturæ rimamur viscera? ponatur sub oculos corpus humanum aliquod nimia Aquæ vitæ copiâ sopitum, emortuum. Feralis homini huic edormiendæ crapula. Rigent marmore ipso frigidiores, partes artuum extremæ. Tenuissima vix deprehenditur caloris scintillula. Penè exsiccatis visceribus, glandulisque; coarctata vasorum extrema sanguinis cursum aut minuunt aut prorsus sistunt impervia liquoribus. Nullus succo nerveo, nullus lymphæ, vasa capillaria pervadendi locus. Somnus profundior, strepitu nullo, etiam si fractus illabatur orbis, dimovendus. Nec mirum! Spiritus moveri & movere idoneos, marcor habet insuperabilis: non secernuntur à lymphâ, à sanguine non secernuntur. Sanguis ipse in vasīs majoribus impeditus, circuitum absolvit pigerrimum. Si qua Medicis fides: si qua experientiæ quotidianæ; morborum innumerorum fomes, aqua vitæ. Bibebat ille (a) aquam vitæ copiosius: hinc membrorum enata paralytis. Laborabat alter vitio eodem, pœnas luit temeritatis suæ, factus (b) apoplecticus. Alter (c) liquoris ejusdem amans luctuosam priorum sortem non effugit inultus: quin immò expertus graviora; prurit totius corporis intolerabilis, irrequieta artuum lassitudo præludia fuere icteri, Dyspnœæ, mortis denique ipsius; quæ utinam corripuisset gradum, doloribus acerbissimis finem ocuis impositura. Plurimi (d) exhibuere homines spiritu vini immoderatè hausto facti stupidi, hebetes, attoniti. *Non acris venas opium momordisset.* Unanimis eâ in re Medicorum consensus: capiti insensibilissima spirituosorum epotatio: affectus generat soporosos, ciborum appetitui, eorundem digestionī iniquior. Testem appello Sylvium; (e) undenam inter Londinenses vulgaris hydrops. In promptu causa est. Aquæ vitæ usus crebrior. At testimonia experimentis confirmantur. Liceat instillare in os felis spiritus vini cochleare unum; cæco igne carpitur: agitur furibunda vitam amissura citius. Insinuantur per venam canis jugularem ope syringis spiritus vini uncie duæ; perit subito miserum animal. Adde ipso ave-

4

subito enecari; chylum, lac, lympham, bilem, liquoresque omnes spiritu vini infectos concrefcere statim in massas ferè offeas, lapidæque. Væ igitur miseris illis, quos ordine inverso mortem juvat pede libero provocare. Apage sint potulenta illa, quæ viribus senescitur prius, quam ætate: quibus prostrato funere dies hominum refecantur.

(a) Hechstetterus Dec. x. c. v. l.

(b) Idem.

(c) Idem.

(d) Platerus, Rolsincius, Hoffm. uterque. Wedelius in Pathol.

(e) Lib. 1. Præx. c. x. idem Lyster. in exercit. de Hydropse.

V.

NEQVIVQVAM saluti hominum consulitur. Trahit sua quemque voluptas. Frustra clamatur a Medicis: caveant malè cauti à spirituosorum haustu; latere sub herbâ anguem. Quid non contrà suggillar imprudentium potatorum malè sana temeritas? Quid non crepat spiritum vini præcipua vitæ inter languentis remedia luculentissimum. Eo corroborari partes corporis omnes, eo augeri magis ac magis fibrarum, si quæ laxæ fuerint, vini reciprocâ, motum oscillationis restitui. Provocat, aïunt, spiritus animales divinus liquor; morantes increpat; stagnantes agit. Foveas membra quælibet malè torpentia vivificâ aquâ: transpirant humores Eâdem fricaveris partes corporis debiliores, paralyticas, etiam contusas frictionem sequitur subitus vigor. Egregiam sanè laudem: quasi verò, dùm in apoplexiis, lethargiis spiritum vini admoves, fiat interna ipsius applicatio. De externâ non ambigitur. Esto naribus, temporibus, pectore, stomacho, pugillis, aquâ vitæ imprægnatis, fibrarum motus reviviscant. Quis aquam vitæ stipticum negat non adèò inefficax. Cujus tamen virtuti, nè plus æquo confidas. Fibras nimis exsiccat spirituosus liquor, vel extrâ admotus. Illo malè crispantur. Illo, eo usque spissantur liquores, ut motum per vascula interrumpat. Undè nimia ipsius vis, aquâ vel succo plantarum moderanda. Ni sic præcaveas: eadem manebit ægrum fors, quæ virum quemdam non infimioris notæ. Laborabat immodico pedum sudore, pori laxiores, meatus apertiores. Iis obstruendis, spiritum vini ratus non imparem, pedes irrorat, fricat infido liquore. Sed quid inde? evanescit penitus pedum transpiratio: crispantur fibrillæ, constringuntur, corrugantur. Hinc acutus capitis dolor: incessus difficilis, importuna alvi subductio. Igitur adhibeas Aquam vitæ intrinsecus, extrinsecus duntaxat admiseris. Ex utroque discrimen grande: hinc premit canis, inde lupus. Caveas tamen attentius ab haustu, cui si gulæ parens obtemperaveris, frustra senectutem præstolabere, morborum iliade citò consumendus.

Ergò aqua vitæ, aqua mortis.

Proponebat Parisiis, LUDOVICUS-PETRUS LE HOC,
Rothomagæus, Baccalaureus Medicus, A.R.S.H. 1729.
à sextâ ad meridiem.

Typis Viduæ J. QUILLAV, Universitatis & Facultatis Medicinæ Typog. 1729.